

Ewald Biemans determina pa contribui na preservacion

Parke di Noord lo yuda crea un area berde continuo pa e pueblo

Tin bon ehempel di reforestacion na Aruba. Ban Lanta y Planta ta un ehempel con reforestacion por traha. Y e no ta un trabou facil. E tema aki ta hopi prominente den e tempo aki basa riba e plannan di Gobierno pa planta 100 mil mata como parti di reforestacion. Ban Lanta y Planta ta parti di un esfuerso pa crea un parke natural pa distrito di Noord.

Ban Lanta y Planta a keda funda pa Ewald Biemans na 2019, kende despues a pasa e fundacion pa e grupo encabezado pa Anita Mijts Aarts, cu a hiba e fundacion na un nivel cu a haci e organizacion uno hopi valioso pa flora di Aruba. Y yabi di e trabou exitoso aki ta danki na Ewald Biemans mes.

For di algun tempo caba, Biemans a cuminsa cumpra tereno na Noord, dilanti di Misa Santa Anna, pa preserva como santuario natural. Ademá di su mesun inversion, a drenta donacion tambe pa preservacion di e area natural aki.

E proyecto a bira un pasion pa Biemans kende diariamente ta cana den e tereno y a traha un ruta pa cana den locual eventualmente lo bira e Parke di Noord, cu actualmente ta 14 hectar of 140 mil meter cuadra. E tereno ta pega cu Scol Basico Washington, y ta brinda muchanan un oportunidad pa gosa di naturalesa Arubiano, y mas ainda permiti nan aprecia e flora y fauna di Aruba.



Tin neishi di shoco riba e tereno mientras cu e kwihi-nan grandi cu a logra sobrevivi desaroyo, ta brinda hogar pa diferente parha. “Aunke cu e cantidad di prikichi si ta menos,” Biemans a lamenta. Asina mes tin prikichi, aunke den menos cantidad ta descansa y biba den locual lo mester bira un joya di parke pa distrito di Noord. E area a pesar di ta banda di caminda, cerca di actividadnan comercial di Palm Beach ta hopi keto. Yeye ta canta ilustrando cambio di temporada, e bariga geel ta bula rond sin preocupacion mientras cu ta topa aki aya cu sushi di cacho cu manera tambe ta un mal custumber na Aruba, ta cana los tur caminda,

Ewald Biemans mes tabata cu su chapi pa kita yerbe of hubada chikito cu ta crece riba e ruta pa cana, cu ta parcialmente cubri cu resto di palo garna, cu ta crea un bista rustico. E proceso aki ta para ya cu mashin di compania cu tabata entrega e asina yama ‘chips’ a dañá.


Y ta los di e preservacion di e area cu tin trabou di Fundacion Ban Lanta y Planta andando pa restaura un parti di e tereno. Tur ta mata local, for di seida te Pal'i Boonchi cu ta haya cuidu regular di parti di boluntarionan cu ta percursa cu por ehempel e sistema di drip ta funciona. Planta mata ta un responsabilidad cu ta trece esfuerso cune, cu ta inclui percursa cu nan ta haya awa ora e mata ta jong. Meta di Ban Lanta y Planta ta pa proteha e biodiversidad unico di Aruba, pa medio di planta mata, conservacion y educacion. E mision ta pa re-crea ecosistemanan sano, combati cambio di clima y hisa e conscientisacion riba e importancia di preserva e medio ambiente natural di Aruba pa futuro generacion.



Educacion

Y ta esaki ta e parti esencial, segun Ewald Biemans, ya cu comunidad mester sa con pa aprecia naturalesa y sa con pa anda cu medio ambiente, pero tambe con pa cuid'e. Biemans ta topa regularmente monton di sushi cu hende ta pasa tira riba e tereno. Berdad e tin resto di mata corta riba e tereno tambe, pero esakinan ta pa bira gordura. Locual ta trece y benta ta tipico sushi varia, cu ta inclui plasticnan y otro material den e area natural aki. Otronan ta djis drenta y corta yerba pa bestia come, sin tene cuenta cu tin e neishi di Shoco cerca. “Mar'e e persona por a corta e yerba rond di Misa,” Biemans a comenta.

E ta un realidad cu ta haci dolor, pero no ta descurasha Ewald Biemans. Simplemente pasobra e ta kere den su parke. Su conviccion ta cu comunidad di Noord, cu ta mas cu bon bini pa cana den e area, sea ta pa haci ejercicio of pa relaha cu amigo, lo sa di aprecia e parke. Aina falta mas camindanan pa por cana, unda entre otro ta haci posibel pa cuminsa e ruta for di Misa Santa Anna, por ehempel. Tambe e tin speranza di por cumpra mas tereno propiedad cu ta pega cu e ‘Parke di Noord’ pa asina amplia esaki. “Algun hende a bisa mi cu mi por haci hopi ganashi si mi laga traha con-



dominio aki riba. Pero, esey lo ta un perdida. Mi kier mi

legado ta e parke aki, pa comunidad di Noord en particular, y Aruba en general,” Ewald Biemans a bisa.